



**TERTIB ACARA KEBAKTIAN MINGGU
GKPS P.BULAN-RESORT POLONIA MEDAN
Minggu PALMARUM, 28 Maret 2021**



TOPIK: "MARSURAK MA BANI HOLONG SATIA NI TUHAN"

Live streaming: www.gkpspadangbulan.com/tv

Tata Ibadah: <http://www.gkpspadangbulan.com/tatib>

1. *Votum – Introitus – Tonggo*

P. Riap ma hita jongjong!

Ibagas goran ni Naibata Bapa, pakon Tuhan Jesus Kristus, ampa Tonduy Napansing, sitompa langit pakon tanoh on. Amen!

P. Ham Jahowa, urupi Ham ma! Ham Jahowa, sai manumpak ma Ham! Pinapasu-pasu ma na roh marhitei goran ni Jahowa. Haleluya, haleluya, haleluya.

P+K: Haleluya, haleluya, haleluya (idodingkon)

P: **Martonggo ma hita:** Ham Tuhan Niabata na sangap anjaha marmulia. Ham do na mangatasi haganup kuasa, janah na paluahkon jolma humbani dousa pakon hamateian. Domma isuruh Ham Tuhan Jesus Kristus roh hu dunia on marsitaronon banggal ronsi matei tarsilang laho manggalar utang ni dousanami. Paahapkon Ham ma hu bannami banggal ni holong-Mu marhitei Jesus Kristus na dob sirsir mangkompok pakon laho paluahkon hanami, ase sintong pangarusion pakon panjalonami hu Bamu. Pasaor Ham ma diri-Mu hu bannami, ase ibagas unduk pakon toruh ni uhur hanami marsombah hu Bamu. Ibagas Jesus Kristus hanami martonggo. Amen (hundul kuria).

2. *Mandoding 408. Haleluya Puji ma Tuhan (1-2)*

1. Haleluya puji ma Tuhan, pasangap marhiteihon gondrang na laingan Irandu pakon inggou na lurlur homa tangaron Dodingkon ma doding na baru, Puji ma la bai hotakNi na ibabou Janah olobkon ma riap marmalas uhur. Sai tarbarita baen goran-Ni, Gok halongangan ganup jadi-jadian-Ni Puji Tuhan Haleluya!

2. Marmegah gok tarima kasih, Halani ganup pasu-pasu 'ge layak-Ni Hubanta na totap sirsir tong mambalosi. Tunggung tumang do tong Tuhanta, la do Raja ni ganup sagala raja Ningon hu Bani do unduk ganup marsombah Sai tarbarita baen goran-Ni , gok halongangan ganup jadi-jadian-Ni Puji Tuhan Haleluya

3. *Hasasapan ni Dousa*

P. Riap ma hita Jongjong!

Martonggo ma hita, sopotkon hita ma dousanta hubani Tuhan Naibata! Ham Tuhan Naibata, parholong atei hubani haganup jolma. Isuruh Ham do hanami manaksihon holong, hasintongan ampa hapintoron-Mu bani goluhnami i dunia on. Tapi gati do hanami lang manjalo hasomannami jolma songon panjalo-Mu hubannami. Masa do itongah-tongahnami sikap napaidah-idah bohi ampa sitonggor jumbak. Age i negaranami pe, idompakko n hanami do pamolah-molahan halani agama, suku ampa ras. Ham Tuhan, maidop ma uhur-Mu mangidah hauhuron pakon pangabaknami dompak hasomannami jolma. Pargogohi Ham ma hanami ase sisada uhur laho pataridahkon holong pakon pajongjongkon hasintongan ampa hapintoron-Mu. Patalar Ham ma kuasa ni holong-Mu hubannami pakon hubani hasomannami na lape mananda Ham, ase lambin itanda janah iahapkon hanami holong-Mu na lang paidah-idah ise pe i lobei-Mu. Sorapkon Ham ma Tonduy Na Pansing bannami, ase ibagas putih ni uhur, borsih ni pingkiran hanami marparsaoran pakon haganup jolma. Ibagas Kristus Jesus Tuhan anjaha Sipaluah hanami, jalo Ham ma hanami, anjaha sasap Ham ma dousanami in. Amen

P. *Tangar anjaha haporsayai hita ma Hata ni Naibata, bagah-bagah pasal hasasapan ni dousa. Domma Hupasisi salahmu songon hambun, ajaha songon hambun na manorap dousamu. Mulak ma ho hu Bangku, ai Ahu do na manobus ho. Ibagas holong ni Naibata, domma isasap haganup dousanta. Halani ai, pataridahkon hita ma tanda-tanda ni pargoluhon na bayu. Hasangapon ma bani Naibata ibabou.*

K. Amen (hundul kuria)

4. **Mandoding 327. Marpangusandeian Bani Tuhan in (1-3)**

1. Marpangusandeian bani Tuhan in,
puji sai pasangap ma goran-Ni in
Monang halani hatani Tuhan in,
mangarapkon parpadanan in
Sai mangarap bani padan ni Tuhanta Jesus Kristus
Sai mangarap ma hita bai partobusan-Ni in

2. Damei do ganupan bani jolma in,
Asal ma porsaya bani Tuhan in.
Ai sirsir do hasonangan na totap
Domu bani padan in tongtong.
Sai mangarap bani padan ni Tuhanta Jesus Kristus
Sai mangarap ma hita bai partobusan-Ni in

3. Sai dalankon horja ni Tuhanta in,
janah sai dingat ma bani padan in.
Sai sirsir martonggo na porsaya in,
Ai podas ma roh Tuhanta in.
Sai mangarap bani padan ni Tuhanta Jesus Kristus
Sai mangarap ma hita bai partobusan-Ni in

5. **Hata haporsayaan**

P. Riap ma hita jongjong!

Saksihon hita ma haporsayaonta in, songon na sinaksihon ni haganup halak na porsaya bani sab tanoh on!

P+K. Ahu porsaya bani Naibata Bapa, Pargogoh na so tarimbang, na manompa langit pakon tanoh on.

Ahu porsaya bani Jesus Kristus, Anak ni Naibata na sasada in, in do Tuhanta, na tinubuhkon ni si Maria sanggah nape haliaban, marhitei Tonduy Na Pansing. Na manaron na parngit, bani panorang ni si Pontius Latus, iparsilangkon, matei anjaha itanom, turun hu nagori toruh. Mulak manggoluh hun bani na matei bani an patoluhon. Naik hu surga anjaha hundul i siamun ni Naibata Bapa, Pargogoh na so tarimbang in. Hunjai ma la mulak magira laho manguhumi halak na manggoluh pakon na dob matei.

Ahu porsaya bani Tonduy Na Pansing, bani Kuria parsadaan na mapansing in, pars Moran ni sagala na mapansing in, bani hasasapan ni dousa, bani

parpuhoon ni angkula, pakon bani hagoluhan na sadokah ni dokahni.
Amen.

6. **Tingting + Tonggo Pangapition**

7. **Mandoding 448. Mantin Ni In do Hape (1+2)**

1. Mantin ni in do hape, padan ni Tuhan Jesus
Pamalas uhur tene, bai ganup na tinobus
Dear tumang padan-Nin, na gabe sijoloman
Patoguh uhur do in bai na marpangarapan
Sai hagolukon ma in baen rudang hajengeson
Ase sonang ham ijin gok Tonduy Hasintongan
Hinalayak-Ni do in pasirsir haluahon
Janah damei uhurmin jumpahan hagoluhan

2. Sai jalo Ham Tuhan in na gabe Siparmahan
Baen hatengeran do in ronsi na ondos padan
Seng habiaran be in pori aha na masa
Ai seng ijin ujungnin, goluh ni na porsaya
Sai hagolukon ma in baen rudang hajengeson
Ase sonang ham ijin gok Tonduy Hasintongan
Hinalayak-Ni do in pasirsir haluahon
Janah damei uhurmin jumpahan hagoluhan

8. **Ambilan: Psalmen 31: 8-16**

9. **Manggalang:**

P. Paima iondoskon hita galanganta, tangar hita ma lobei Hata ni Naibata na gabe onjolan banta laho manggalang, aima na tarsurat bani: 2 Korint 9:7
“Ganup ma jinuljul ni uhurni, ulang ma humbani borat ni uhur atap halani paksa, ai ihaholongi Naibata do halak na malas uhur mambere”

Sonari patumpu hita ma galanganta.

10. **Tonggo Galangan – Panutup :**

P. Riap ma hita jongjong!

. Martonggo ma hita mangondoskon galanganta hubani Naibata!

Ham Tuhan Naibata, Bapanami, pardear layak janah na unjah hu bannami.
Tarima kasih ma hatahononami hu Bamu, halani tongtong do ipasu-pasu

Ham goluhnami. Domma ihasomani Ham hanami janah ipasu-pasu Ham horjanami dan hubani sadari on. Sonari, ibagas malas ni uhur roh do hanami mangondoskon buah ni horja na dob pinapasu-pasu-Mu in gabe galangan hatarimkasihon pakon puji-pujiannami hu Bamu. On pe sai jalo Ham ma galangannami on, bahen hasangapon ni goran-Mu janah mambahen lambin marhataridahan harajaon-Mu i dunia on. Ibagas goran ni Anak-Mu, Jesus Kristus Tuhannami, jalo Ham ma tonggonami on. Amen

K. (Mandodingkon doding galangan-Haleluya No. 340:1)

Huondoskon bani Jesus haganupan diringkon
Ia do pasangaponku sadokah bai goluhkon
Huondoskon ma, huondoskon ma.
Bani Jesus Sipaluah, huondoskon

P. Ham Bapanami, na marhabangsa I nagori atas. Bap ana sari do Ham mampardiateihon pargoluhannami. Patut do hanami hona uhuman-Mu halani bangga ni dousa na ihorjahon hanami. Tapi tarolos do Ham paluahkon hanami, marhitei na marsuruh Anak-Mu Jesus Kristus roh hu dunia on bahen tobus ni dousanami. Marsitaronon na borat do Anak-Mu Jesus Kristus mandagei na parngit; itulak, irisai, anjaha ipahiri. Haganupan in idompakkon Anak-Mu in ibagas in ma manjagai uhur pakon pingkirannami ase lambin ihargahon hanami pangkopkopon-Mu anjaha lambin ibotoh hanami pasangapkon Ham. Ipadas hanami tonggonami on ibagas Jesus Kristus Tuhannami. Amen

P. Ham Bapanami na i nagori atas, sai na papansing ma goran-Mu. Sai roh ma harajaon-Mu. Sai saud ma harosuh ni uhur-Mu i nagori tongah on songon na i nagori atas. Bere Ham ma bannami sadari on hagoluhan ari-ari. Sasap Ham ma dousanami songon panasapnami bani dousa ni hasoman na mardousa dampak hanami, Ulang hanami bobai Ham hu parlajouan. Paluah Ham ma hanami humbani pangangou!

K. (Manoruskon tonggo on marhitei na mandodingkon)

Ai ham do simada harajaon, pakon hagogohon, ampa hasangapon, sadokah ni dokahni. Amen.

P : Misir ma nasiam, janah gabe siboan paus-pasu ma ham, anjaha sari bani ganup halak.

Jalo ham (hita) ma pasu-pasu humbani Tuhan Naibatanta:

Ipasu –pasu anjaha iparorot Tuhan Naibata ma Ham (hita). Isondangkon Tuhan Naibata ma bohiNi hu bamu (hu banta) janah maidop ma uhurNi mangidah ham (hita). Idompakhon Tuhan Naibata ma bohiNi hu bamu (hu banta) janah ipasorap ma dameiNi bani tonduymu (tonduyta bei) Amen.

Ganup: (mandodingkon) Amen..... Amen Amen!